

**“СЭНДЛИ” ББСБ**  
**ГҮЙЦЭТГЭХ ЗАХИРЛЫН ТУШААЛ**

---

2022. оны 1. сарын 3.

№. 7/02

Улаанбаатар хот

“Сэндли банк бус санхүүгийн байгууллагын зээлийн бодлого” батлах тухай

Компанийн тухай хуулийн 83 дугаар зүйлийн 83.1 дэхь заалт, “Сэндли ББСБ” ХХК-ийн дүрмийн 9.8.9 дэхь хэсгийг тус тус үндэслэн ТУШААХ нь:

1. “Сэндли ББСБ” ХХК-ийн “Зээлийн бодлого”-ыг хавсралтаар баталсугай.
2. “Сэндли ББСБ” ХХК-ийн зээлийн бодлогыг 2022 оны 01 дүгээр сарын 03-ны өдрөөс эхлэн мөрдсүгэй.
3. Зээлийн бодлого батлагдсантай холбогдуулан холбогдох журам зааврыг боловсруулахыг Зээлийн бодлого хариуцсан захирал /А.Итгэлт/-д даалгасугай.
4. Энэхүү тушаалын хэрэгжилтэнд хяналт тавьж ажиллахыг Салбарын удирдлага хариуцсан захирал /П.Болорчулуун/-д даатгасугай.

ГҮЙЦЭТГЭХ ЗАХИРАЛ



Б. ОДГЭРЭЛ

**СЭНДЛИ БАНК БУС САНХҮҮГИЙН  
БАЙГУУЛЛАГЫН ЗЭЭЛИЙН БОДЛОГО**

**АГУУЛГА:**

**НЭГДҮГЭЭР БҮЛЭГ**

**НИЙТЛЭГ ҮНДЭСЛЭЛ**

- 1 дүгээр зүйл. Бодлогын зорилго
- 2 дугаар зүйл. Үндсэн зорилтууд
- 3 дугаар зүйл. Бодлогын үйлчлэх хүрээ
- 4 дүгээр зүйл. Бодлогын нэр томъёоны тодорхойлолт

**ХОЁРДУГААР БҮЛЭГ**

**ЗЭЭЛИЙН ҮЙЛ АЖИЛЛАГААНД БАРИМТЛАХ БОДЛОГО**

- 5 дугаар зүйл. Зорилтод зах зээл
- 6 дугаар зүйл. Зорилтод харилцагч
- 7 дугаар зүйл. Зээл шийдвэрлэх эрх мэдэл
- 8 дугаар зүйл. Зээлийн үйл ажиллагаанд тавигдах зарчим, зээлийн судалгаа
- 9 дүгээр зүйл. Хориглох үйл ажиллагаа
- 10 дугаар зүйл. Зээлийн багцын талаар баримтлах бодлого
- 11 дүгээр зүйл. Зээл олгох хугацааны хязгаар
- 12 дугаар зүйл. Нэг зээлдэгчид олгох зээлийн хязгаар

**ГУРАВДУГААР БҮЛЭГ**

**ЗЭЭЛИЙН БҮТЭЭГДЭХҮҮН, ҮЙЛЧИЛГЭЭНИЙ ТАЛААР БАРИМТЛАХ БОДЛОГО**

- 13 дугаар зүйл. Зээлийн бүтээгдэхүүний бүтэц
- 14 дүгээр зүйл. Зээлийн хүү, шимтгэлийн талаар баримтлах бодлого
- 15 дугаар зүйл. Зээлийн бүтээгдэхүүний нөхцөл
- 16 дугаар зүйл. Зээлийн баримт бичиг

**ДӨРӨВДҮГЭЭР БҮЛЭГ**

**БАРЬЦААНЫ ЗҮЙЛИЙН ТАЛААР БАРИМТЛАХ БОДЛОГО**

- 17 дугаар зүйл. Зээлийн барьцаа, батлан даалт, баталгаа

**ТАВДУГААР БҮЛЭГ**

**ЗЭЭЛИЙН ЭРСДЭЛИЙН УДИРДЛАГА, ХЯНАЛТЫН БОДЛОГО**

- 18 дугаар зүйл. Зээлийн эрсдэлийн удирдлагын бодлого
- 19 дүгээр зүйл. Зээлийн ангилал, эрсдэлийн сангийн талаар бар
- 20 дүгээр зүйл. Зээлийн үйл ажиллагаанд тавих хяналт

# **СЭНДЛИ БАНК БУС САНХҮҮГИЙН БАЙГУУЛЛАГЫН ЗЭЭЛИЙН БОДЛОГО**

## **НЭГДҮГЭЭР БҮЛЭГ НИЙТЛЭГ ҮНДЭСЛЭЛ**

### **1 дүгээр зүйл. Бодлогын зорилго**

1.1. Сэндли банк бус санхүүгийн байгууллага (цаашид “ББСБ” гэх)-ын зээлийн бодлогын зорилго нь ББСБ-аас зээлийн үйл ажиллагаа болон зээлийн бүтээгдэхүүн үйлчилгээний талаар баримтлах бодлого, мөрдөх хязгаар, хяналтын тогтолцоог тодорхойлж зээлийн эрсдэлийг бууруулахад оршино.

### **2 дугаар зүйл. Үндсэн зорилтууд**

2.1. Харилцагчдын санхүүгийн эрэлт хэрэгцээнд нийцсэн зээлийн бүтээгдэхүүн, үйлчилгээг санал болгож, урт хугацааны тогтвортой харилцааг бий болгон бэхжүүлнэ.

2.2. Зээлийн үйл ажиллагаанд тавих хяналтын тогтолцоог боловсронгуй болгосноор чанаргүй зээл үүсч бий болохоос урьдчилан сэргийлж, зээлийн эрсдэлийг хамгийн бага түвшинд барьж ажиллана.

### **3 дугаар зүйл. Бодлогын үйлчлэх хүрээ**

3.1. Энэхүү бодлого нь Сэндли ББСБ-ын зээлийн үйл ажиллагаанд оролцож буй нэгж, бүх ажилтан, зээлийн хороодын баримтлах үндсэн баримт бичиг байна

3.2. Эрх зүйн бүрэн чадамжтай Монгол улсын иргэн, хуулийн этгээдийн санхүүгийн хэрэгцээнд зориулж зээл олгоно.

3.3. ББСБ нь гадаадын иргэн, Монгол Улсад бүртгэлгүй хуулийн этгээдэд зээл олгохгүй.

### **4 дүгээр зүйл. Бодлогын нэр томъёоны тодорхойлолт**

4.1. Энэ бодлогод хэрэглэсэн дараах нэр томъёог дор дурьдсан утгаар ойлгоно:

4.1.1. “Зээл” гэж ББСБ-аас иргэн, хуулийн этгээдэд ББСБ-аас тогтоосон болзол, нөхцөлийн дагуу олгосон мөнгөн хөрөнгө, гаргасан баталгаа, батлан даалт, аккредитив болон тэдгээртэй адилтгах бусад актив хөрөнгийг;

4.1.2. “Зээл шийдвэрлэх эрх мэдэл” гэж нэг зээлдэгч, болон түүнтэй холбогдох холбоотой этгээдэд олгох зээлийн дээд хэмжээнд багтаан шийдвэрлэх зээлийн хорооны эрхийг;

4.1.3. “Зээлийн ажилтан” гэж ББСБ-ын салбарын захирал, харилцааны менежер, цахим зээл хариуцсан ажилтан, актив хариуцсан менежер;

4.1.4. “Холбогдох этгээд” гэж ББСБ-ын хувьцаа эзэмшигч, төлөөлөн удирдах зөвлөлийн дарга, гишүүд, гүйцэтгэх захирал, бусад ажилтанг

## **ХОЁРДУГААР БҮЛЭГ ЗЭЭЛИЙН ҮЙЛ АЖИЛЛАГААНД БАРИМТЛАХ БОДЛОГО**

### **5 дугаар зүйл. Зорилтот зах зээл**

5.1. ББСБ нь иргэн, хуулийн этгээдийн санхүүгийн хэрэгцээнд зориулан зээл олгох бодлогоо үргэлжлүүлэн хэрэгжүүлнэ.

5.2. Жижиг, дунд худалдаа үйлчилгээ, үйлдвэрийн хөгжлийн чиг хандлагад үндэслэн тэргүүлэх ач холбогдол бүхий салбарын үйл ажиллагааг дэмжинэ.

### **6 дугаар зүйл. Зорилтот харилцагч**

6.1. ББСБ нь зах зээлийн эрэлт, өрсөлдөөний нөхцөл байдал, харилцагчийн шинж чанар, зээлжих чадвар, хэрэгцээ шаардлагад тулгуурлан зорилтот харилцагч нарт зээлийн бүтээгдэхүүнээр үйлчилнэ.

6.2. Жижиг, дунд үйлдвэр, үйлчилгээ, худалдааны бизнес эрхлэгч иргэн, хуулийн этгээдийн үйл ажиллагааг дэмжих болон иргэдийн хэрэглээнд тохирсон зээлийн бүтээгдэхүүн, үйлчилгээний уян хатан нөхцөлийг бүрдүүлнэ.

## **7 дугаар зүйл. Зээл шийдвэрлэх эрх мэдэл**

7.1. ББСБ нь дараах түвшний зээлийн хороодтой байна.

7.1.1. Зээлийн ерөнхий хороо

7.1.2. Салбарын зээлийн хороо

7.1.3. Салбарын захирал

7.1.4. Зээлийн ажилтан

7.1.5. Цахим зээлийн кредит скоринг

7.2. Зээлийн хорооны гишүүн нь зээлийн үйл ажиллагааны талаар өндөр мэдлэгтэй, ажлын туршлагатай, зээлийн эрсдэлийг бодитой үнэлэх чадвартай, хариуцлагатай, шударга, сонирхлын зөрчилгүй ажилтан байна.

7.3. Цахим зээлийн кредит скорингийн аргачлалыг зээлийн ерөнхий хорооны хурлаар хэлэлцэж шийдвэрлэнэ.

7.4. Зээлийн ерөнхий хороо, салбарын зээлийн хорооны үйл ажиллагааг “Зээлийн хорооны ажиллах журам”-аар зохицуулна.

## **8 дугаар зүйл. Зээлийн үйл ажиллагаанд баримтлах зарчим, зээлийн судалгаа**

8.1. ББСБ нь судалгааны үндсэн дээр болон скорингийн үнэлгээний аргачлалаар зээл эргэн төлөх чадварыг тодорхойлж зээл олгох зарчмыг баримтална.

8.2. ББСБ нь орчин үеийн технологи шийдлийг ашиглан цахимаар зээл олгохыг чухалчилна.

8.3. ББСБ-ын зээлийн үйл ажиллагаа нь талуудын санхүү, төлбөрийн чадварт үндэслэсэн харилцан ашигтай байна.

8.4. Зээлийг тодорхой зориулалтаар хүүтэй, хугацаатай, үүргийн гүйцэтгэлийг хангуулах барьцааны зүйл, баталгаа, батлан даалттай, эргэн төлөгдөх нөхцөлтэйгөөр олгоно.

8.5. Зээлийн судалгааг дараах зорилгоор хийнэ.

8.5.1. Зээл олгох,

8.5.2. Зээлийн гэрээний нөхцөлд өөрчлөлт оруулах

8.5.3. Олгогдсон зээлд явцын хяналт хийх, дүгнэлт гаргах.

8.6. ББСБ-ын салбар, нэгжийн зээлийн холбогдох ажилтан нь харилцагчийн хүсэлтэд судалгаа шинжилгээг хийж санал дүгнэлтийг гаргана.

8.7. Судалгаа шинжилгээний явцад харилцагчийн хувийн шинж чанар, санхүү, төлбөрийн чадвар, зээлийн барьцаа, баталгаа, санхүүгийн хөрөнгө, бизнесийн үйл ажиллагааны нөхцөл байдал зэргийг тодорхойлно.

8.8. Нэгж нь зээлийн эрсдэлийг бууруулах зорилгоор зээлийн судалгаа шинжилгээнд олон улсын практикт өргөн хэрэглэгддэг аргуудыг ашиглаж болно.

## **9 дүгээр зүйл. Хориглох үйл ажиллагаа**

9.1. Монгол Улсын хууль тогтоомжоор хориглосон болон байгаль орчинд хор хөнөөл учруулах аливаа үйл ажиллагааг санхүүжүүлэхгүй.

9.2. Олон улсын эрх бүхий байгууллагаас зарласан “Хоригийн жагсаалт”-д бүртгэгдсэн иргэн, хуулийн этгээдэд зээл олгох,

9.3. Хар тамхи, мансууруулах бодис үйлдвэрлэх, импортлох, худалдах төрлийн үйл ажиллагаанд зээл олгох,

9.4. Мөрийтэй тоглоомын үйл ажиллагаанд зээл олгох,

9.5. Олон шатлалт маркетинг буюу пирамид тогтолцооны замаар хууран мэхэлж богино хугацаанд ашиг хонжоо олох үйл ажиллагаанд зээл олгох.

#### **10 дугаар зүйл. Зээлийн багцын талаар баримтлах бодлого**

10.1. Бизнесийн тухайлсан нэг салбарт хэт төвлөрөл үүсэхээс урьдчилан сэргийлэх зорилгоор Зээлийн бодлого, Эрсдэлийн удирдлагын чиг үүргийн ажилтан зээлийн багцын бүтцэд хяналт тавьж Эрсдэлийн удирдлагын хороонд тайлагнана,

10.2. ББСБ нь 100,000,000.00 /нэг зуун сая/ төгрөгөөс хэтрэхгүй, түүнтэй тэнцэх хэмжээний валютын зээлийг жижиг, 100,000,000.00 /нэг зуун сая/ төгрөгөөс дээш түүнтэй тэнцэх хэмжээний валютын зээлийг том зээл гэж үзнэ.

10.3. Зээлийн үйл ажиллагаанаас гарч болох эрсдэлийг бууруулах, зээлийн төвлөрлийн эрсдэлээс урьдчилан сэргийлэх зорилгоор нийт зээлийн багцад том зээлийн багцын эзлэх хувийн жинг 30 хувиас хэтрүүлэхгүй барьж ажиллана.

#### **11 дүгээр зүйл. Зээл олгох хугацааны хязгаар**

11.1. Зээлийн хугацаа нь 1-12 сар бол бол богино, 13-24 сар хүртэл бол дунд, 25-36 сар ба ба түүнээс дээш хугацаагаар олгогдох зээлийг урт хугацааны зээл гэж ангилна.

#### **12 дугаар зүйл. Нэг зээлдэгчид олгох зээлийн хязгаар**

12.1. “Банк бус санхүүгийн байгууллагын үйл ажиллагааны зохистой харьцааны шалгуур үзүүлэлтийг тооцож хяналт тавих журам”-д заасныг мөрдөн ажиллана.

### **ГУРАВДУГААР БҮЛЭГ**

## **ЗЭЭЛИЙН БҮТЭЭГДЭХҮҮН, ҮЙЛЧИЛГЭЭНИЙ ТАЛААР БАРИМТЛАХ БОДЛОГО**

#### **13 дугаар зүйл. Зээлийн бүтээгдэхүүний бүтэц**

13.1. Зээлийн бүтээгдэхүүн үйлчилгээг зээлдэгчийн шинж чанар, зээлд тавигдах шаардлага, зээлийн нөхцөлөөс шалтгаалан дараах төрлүүдтэй байна. Үүнд:

13.1.2. Хуулийн этгээдийн зээл. Аж ахуйн нэгж, байгууллагын эргэлтийн хөрөнгийн санхүүжилт болон тэдгээрийн тоног төхөөрөмж худалдан авах, үйлдвэрлэл, үйлчилгээг өргөтгөх, шинэчлэх зэрэг бизнесийн үйл ажиллагаанд нь зориулж зээл олгоно. Бизнесийн үйл ажиллагаанд олгож буй зээл нь үйл ажиллагааны тогтвортой байдал, мөнгөн урсгалын төлөвлөгөөнд үндэслэгдсэн байхын зэрэгцээ хангалттай хэмжээний барьцаа, баталгаатай байхыг шаардана.

13.1.3. Иргэдийн зээл. Иргэдэд цалин болон түүнтэй адилтгах орлого, бизнесийн орлогоороо хэсэгчлэн төлөх нөхцөлтэйгөөр барьцаа, баталгааг харгалзан хэрэглээ, бизнесийн болон орон сууцны санхүүжилтийн зээл олгоно.

13.2. Зээлийн шинэ бүтээгдэхүүн нэвтрүүлэх, шинэ салбарт зээл олгох судалгаа шинжилгээг Зээлийн бодлогын чиг үүрэг бүхий ажилтан хийж Зээлийн хорооны хурлаар хэлэлцэж шийдвэрлэнэ.

#### **14 дүгээр зүйл. Зээлийн хүү, шимтгэлийн талаар баримтлах бодлого**

14.1. Зээлийн хүүг тогтоохдоо зээл төлөгдөхөд учирч болзошгүй эрсдэлийн зардал, эх үүсвэрийн зардал, ББСБ-ын ашигт ажиллагаа, тухайн үеийн улс орны эдийн засаг, мөнгөний бодлого болон зээлийн бүтээгдэхүүн үйлчилгээний зах зээлийн өрсөлдөөн, бусад арилжааны банк, ББСБ-уудын хүүгийн түвшин зэргийг харгалзан үзнэ.

14.2. ББСБ-ын зээлийн хүүгийн бодлого нь харилцагч татах, зах зээлд байр сууриа хадгалах, ашигтай ажиллах боломжийг бүрдүүлсэн байхад чиглэнэ.

14.3. Зээлийн бодлогын чиг үүрэг бүхий ажилтан нь зээлийн бүтээгдэхүүн тус бүрт баримтлах хүүгийн түвшний талаарх саналыг боловсруулж зээлийн хорооны хуралд тухай бүр танилцуулж шийдвэрлүүлнэ.

#### **15 дугаар зүйл. Зээлийн бүтээгдэхүүний нөхцөл**

15.1. Зээлийн бүтээгдэхүүн тус бүрт баримтлах нөхцөл буюу зээлийн хэмжээ, хүү, хугацаа, шимтгэл, хураамжийн хэмжээг холбогдох хорооны хурлын шийдвэрийг үндэслэн Гүйцэтгэх захирлын тушаалаар батлах болон батлагдсан нөхцөлд өөрчлөлт оруулна.

15.2. Зээлийн бүтээгдэхүүний нөхцөл нь зах зээлийн эрэлт, өрсөлдөөний нөхцөл, бүтээгдэхүүний зориулалт, бизнесийн үйл ажиллагаа, санхүүжилтийн онцлогоос шалтгаалан харилцан адилгүй байна.

15.3. Зээлдэгчийн хүсэлтийг үндэслэн зээлийг өөр төрлийн бүтээгдэхүүнд шилжүүлэх асуудлыг хэрхэн шийдвэрлэх талаар “Зээлийн үйл ажиллагааны журам”-д нарийвчлан тусгаж судалгааны үндсэн дээр шийдвэрлэж болно.

15.4. Зээлийн гэрээний нөхцөлд өөрчлөлт оруулах асуудлыг “Актив ангилах, активийн эрсдэлийн сан байгуулж зарцуулах журам”, “Зээлийн үйл ажиллагааны журам”-аар зохицуулна.

#### **16 дугаар зүйл. Зээлийн баримт бичиг**

16.1. ББСБ-ын зээлийн үйл ажиллагаанд Гүйцэтгэх захирлын тушаалаар батлагдсан нэгдсэн стандарт загвар бүхий Гэрээ, маягтуудыг ашиглах ба шаардлагатай тохиолдолд нэмэлт, өөрчлөлт оруулна.

16.2. Зээлийн гэрээ нь зээл олгох, түүнийг эргүүлэн төлүүлэхтэй холбогдсон талуудын эрх, үүрэг, хариуцлага тохиролцоог илэрхийлэх эрх зүйн үндсэн баримт болно.

16.3. Барьцаа, фидуци, батлан даалтын гэрээ болон баталгааны гэрээ, нэмэлт гэрээнүүд нь зээлийн гэрээний салшгүй хэсэг байна.

16.4. Зээлийн бүтээгдэхүүн тус бүрд бүрдүүлэх баримт, материал, түүнд тавигдах шаардлага харилцан адилгүй тул энэ талаар “Зээлийн үйл ажиллагааны журам”-д дэлгэрэнгүй заасан байна.

16.5. Зээлдэгч бүрийн нэр дээр зээлийн хувийн хэрэг нээж хөтөлнө.

16.6. Харилцагчийн бизнесийн үйл ажиллагаа, санхүүгийн байдал болон бусад асуудлыг хөндсөн мэдээллийг чандлан нууцлах, харилцагчийн эрхийг хүндэтгэх, зээлийн үйл ажиллагаатай холбоотой нууцлалын зэрэгт орох баримтын хадгалалт, хамгаалалт, зээлийн хувийн хэргийн бүрдүүлбэрийн талаар “Зээлийн үйл ажиллагааны журам”-д тусгаж мөрдөнө.

### **ДӨРӨВДҮГЭЭР БҮЛЭГ**

#### **БАРЬЦААНЫ ЗҮЙЛИЙН ТАЛААР БАРИМТЛАХ БОДЛОГО**

#### **17 дугаар зүйл. Зээлийн барьцаа, батлан даалт, баталгаа**

17.1. ББСБ нь барьцааны зүйлгүйгээр зээл олгохгүй ба зээл олгохдоо хуулиар хориглоогүй бөгөөд зээл хүсэгчийн хууль ёсны өмчлөлд байгаа хөдлөх болон үл хөдлөх эд хөрөнгө, эд хөрөнгийн эрх, мөн зээлдүүлэгчээс зөвшөөрсөн бусад эрх, эд зүйл, ирээдүйн орлогыг барьцаалж болно.

17.2. Зээлийн барьцааны зүйл нь үнэлгээтэй, зах зээлд эрэлттэй, түргэн борлогдох чадвартай, өмчлөх эрх шилжүүлэхэд хялбар, хуулийн хүчин төгөлдөр, хөшүүргийн үнэ цэнэтэй байх шаардлагыг хангасан байвал зохино.

17.3. Барьцааны зүйлийн үнэлгээг ББСБ-ын эрх бүхий ажилтан хийх бөгөөд шаардлагатай тохиолдолд ББСБ нь гадны мэргэжлийн үнэлгээчин, хөрөнгийн үнэлгээний компанитай гэрээ байгуулан үнэлгээ хийлгэж болно.

17.4. Зээлдэгчийн зээлийн гэрээгээр хүлээсэн үүргийн гүйцэтгэлийг бүрэн эсвэл хэсэгчлэн хариуцахаар гуравдагч этгээд барьцаа, баталгаа, батлан даалт гаргаж болно.

17.5. Батлан даагч нь санхүүгийн хувьд зээлийн төлбөрийг өөрийн гаргасан барьцаа хөрөнгө, батлан даалтын хэмжээнд бүрэн хариуцах чадвартай, үйл ажиллагаа нь амжилттай явагдаж байгаа иргэн, хуулийн этгээд байна.

17.6. Зээлийн барьцааны зүйлийн төрлөөс хамааран тухайн барьцааны зүйлийг ББСБ-д барьцаалсан тухай холбогдох эрх бүхий байгууллагад бүртгүүлнэ.

## **ТАВДУГААР БҮЛЭГ**

### **ЗЭЭЛИЙН ЭРСДЭЛИЙН УДИРДЛАГА, ХЯНАЛТЫН БОДЛОГО**

#### **18 дугаар зүйл. Зээлийн эрсдэлийн удирдлагын бодлого**

18.1. ББСБ нь Эрсдэлийн удирдлагын бодлоготой байх бөгөөд уг бодлогод зээлийн үйл ажиллагаанд учирч болзошгүй эрсдэлийг тодорхойлох, үнэлэх, зохистой удирдах, урьдчилан сэргийлэх, эрсдэлийг бууруулах, хянах замаар удирдлагын үр ашигтай системийг бүрдүүлж хэрэгжүүлнэ.

18.2. Зээлдэгч ББСБ-ын өмнө хүлээсэн гэрээний үүргээ хугацаанд нь биелүүлээгүйгээс ББСБ зээлийн үйл ажиллагаанаас хүлээх алдагдлыг хамгийн бага түвшинд барьж ажиллана.

#### **19 дүгээр зүйл. Зээлийн ангилал, эрсдэлийн сангийн талаар баримтлах бодлого**

19.1. Зээл, түүнтэй адилтган тооцох бусад актив хөрөнгөнд холбогдох эрсдэлийн сан байгуулах, сангаас муу зээл хааж хорогдуулах, хяналт тавихдаа Санхүүгийн зохицуулах хорооноос батласан “Активыг ангилах, активын эрсдэлийн сан байгуулж, зарцуулах журам”-ыг баримтална.

#### **20 дугаар зүйл. Зээлийн үйл ажиллагаанд тавих хяналт**

20.1. Зээлийн үйл ажиллагаанд гарч болох эрсдэлийг бууруулах зорилгоор дотоодын болон хөндлөнгийн хяналтын тогтолцоог хэрэгжүүлнэ.

20.2. ББСБ-ын дотоод хяналтын тогтолцоо нь нэгж тус бүрийн үйл ажиллагааны өдөр тутмын тогтмол хяналт болон хяналтын нэгжээс хийгдэх хяналтаас бүрдэнэ.

20.3. Өдөр тутмын шат дараалсан хяналтыг зээлийн ажилтан бүр хэрэгжүүлнэ.

20.4. Зээлийн үйл ажиллагаанд тавигдах хяналтыг явцын, баримтын, газар дээрх, гэнэтийн байдлаар ББСБ-аас батлагдсан чиг үүргийн хүрээнд гүйцэтгэнэ.

20.5. Энэхүү бодлого нь Сэндли ББСБ-ын өмч бөгөөд үүнийг хувилах, гадагш тараах зэргийг хатуу хориглоно. Зөвхөн албаны хэрэгцээнд, дотооддоо ашиглана.

**СЭНДЛИ ББСБ**